



**ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ
ՈՐՈՇՈՒՄ**

20 մարտ 2025 թվական

N 02-L

**ԱՆՀԱՄԱՏԵՂԵԼԻՈՒԹՅԱՆ ՊԱՀԱՆՋՆԵՐԻ ՊԱՀՊԱՆՄԱՆ
ՄՇՏԱԴԻՏԱՐԿՄԱՆ 2025 ԹՎԱԿԱՆԻ ՊԼԱՆԸ ՀԱՍՏԱՏԵԼՈՒ ՄԱՍԻՆ**

Հիմք ընդունելով «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 1-ին կետը՝ Կոռուպցիայի կանխարգելման հանձնաժողովը (այսուհետ՝ Հանձնաժողով) **որոշում է.**

1. Հաստատել Հանձնաժողովի՝ անհամատեղելիության պահանջների պահպանման մշտադիտարկման 2025 թվականի պլանը՝ համաձայն հավելվածի:
2. Սույն որոշումն ուժի մեջ է մտնում պաշտոնական հրապարակմանը հաջորդող օրվանից:

**ՀԱՆՁՆԱԺՈՂՈՎԻ ՆԱԽԱԳԱՀԻ
ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝**

ՄԱՐԻԱՄ ԳԱԼՍՏՅԱՆ

ք. Երևան

ԱՆՀԱՄԱՏԵՂԵԼԻՈՒԹՅԱՆ ՊԱՅԱՆՁՆԵՐԻ ՊԱՅՊԱՆՄԱՆ

ՄՇԱԿԻՏԱՐԿՄԱՆ ՊԼԱՆ

2025 ԹՎԱԿԱՆԻ

ՆԿԱՐԱԳՐՈՒԹՅՈՒՆ

Հանձնաժողովը հանրային համապատասխան պաշտոն զբաղեցնող անձանց անհամատեղելիության պահանջների պահպանման գործառույթի շրջանակներում իրականացնում է ռիսկային պաշտոններ զբաղեցնող անձանց անհամատեղելիության պահանջների տարեկան մշտադիտարկում:

Անհամատեղելիության պահանջների մշտադիտարկումն իրականացվում է Հանձնաժողովի կողմից նախապես սահմանված և հաստատած՝ հանրային իշխանության մարմինների/պաշտոնների շրջանում:

Սույն պլանով սահմանվող մշտադիտարկման նպատակն է ուսումնասիրության և տվյալների համադրության միջոցով բացահայտել Կառավարության անդամների և վերջիններիս խորհրդականների շրջանում առկա անհամատեղելիության պահանջների խախտումները, վերլուծել խախտումներ թույլ տալու պատճառները և, որպես վերջնական պատակ, իրականացնել համապատասխան միջոցառումներ՝ նվազագույնի հասցնելու խախտումների քանակը, ինչպես նաև իրազեկման և վերապատրաստումների միջոցով հնարավորինս կառավարելի դարձնելու անհամատեղելիության պահանջների պահպանմանն առնչվող խնդիրները:

ՀԻՄՆԱԿՈՐՈՒՄ

«Կոռուպցիայի կանխարգելման հանձնաժողովի մասին» օրենքի (այսուհետ՝ Օրենք) 23-րդ հոդվածի 1-ին մասի 1-ին կետի համաձայն՝ Հանձնաժողովը հետևում է **պետական պաշտոն զբաղեցնող անձանց**, համայնքների ղեկավարների, նրանց տեղակալների, Երևան համայնքի վարչական շրջանների ղեկավարների, նրանց տեղակալների պաշտոն զբաղեցնող անձանց կողմից Օրենքով սահմանված անհամատեղելիության պահանջների և այլ սահմանափակումների պահպանմանը:

Նշված գործառույթի ապահովման, ինչպես նաև պետության ստանձնած միջազգային պարտավորությունների կատարման շրջանակներում 2022-2024 թվականներին Հանձնաժողովն իրականացրել է պետական և համայնքային պաշտոններ զբաղեցնող անձանց անհամատեղելիության պահանջների պահպանման ստուգում: Եվրոպայի Խորհրդի Կոռուպցիայի դեմ պայքարի պետությունների խմբի (այսուհետ՝ ԳՐԵԿՈ) կողմից ընդունված՝ Հայաստանի Հանրապետության գնահատման 4-րդ և 5-րդ փուլերի զեկույցներով առանձնահատուկ ուշադրություն է դարձվել օրենսդիր և գործադիր իշխանության ներկայացուցիչների կողմից անհամատեղելիության պահանջների օրենսդրական կարգավորումների շրջանցման բացառմանը և նշված զեկույցներով տրված առաջարկությունները, հիմնականում, հիմք են հանդիսացել Հանձնաժողովի կողմից տարեկան մշտադիտարկման թիրախային կազմի ընտրության համար: Այսպես՝

- 2022 թվականին որպես ուսումնասիրության սուբյեկտ ընտրվել են օրենսդիր իշխանության ներկայացուցիչները՝ Ազգային ժողովի 108 պատգամավորներ, հաշվի առնելով, որ ԳՐԵԿՈ-ի կողմից ընդունված՝ Հայաստանի Հանրապետության 4-րդ փուլի գնահատման զեկույցով առաջարկվել էր համապատասխան միջոցներ ձեռնարկել՝ կանխելու համար առևտրային կազմակերպությունում պաշտոն զբաղեցնող պատգամավորների նկատմամբ կիրառվող և նրանց կողմից ձեռնարկատիրական գործունեությամբ զբաղվելու կամ ձեռնարկատիրական գործունեության շրջանակներում այլ վճարովի աշխատանք կատարելու սահմանափակումների շրջանցման հնարավորությունները: Ուսումնասիրության գործընթացը և արդյունքները ներկայացվել են Հանձնաժողովի՝ կիսամյակային հաշվետվությունների և 2022 թվականի տարեկան հաղորդման շրջանակներում:

- 2023 թվականին ԳՐԵԿՈ-ի՝ Հայաստանի Հանրապետության գնահատման 5-րդ փուլի միջանկյալ զեկույցով առաջարկվել է միջոցներ ձեռնարկել՝ կանխելու ՀՀ կառավարության և կառավարությանը ենթակա մարմինների՝ առևտրային կազմակերպություններում պաշտոններ զբաղեցնելու, ձեռնարկատիրական գործունեությամբ զբաղվելու կամ դրա շրջանակներում այլ վճարովի աշխատանք կատարելու սահմանափակումների շրջանցումը: Հայաստանի Հանրապետության ստանձնած

պարտավորությունների շրջանակներում հանձնարարականի կատարումն ապահովելու նպատակով Հանձնաժողովը, անհամատեղելիության պահանջների պահպանմանը հետևելու նպատակով 2023 թվականին ուսումնասիրությամբ ընդգրկել է գործադիր իշխանության՝ կառավարության, կառավարության ենթակա մարմինների, վարչապետի ենթակա մարմինների ղեկավար կազմը (ընդհանուր՝ 108 պաշտոնատար անձ): Մշտադիտարկման գործընթացի արդյունքներն ամփոփվել և հրապարակվել են Հանձնաժողովի պաշտոնական կայքէջում՝ հետևյալ հղումով՝ <http://cpcarmenia.am/hy/news/item/2024/03/20/1/>:

Կարևորելով գործընթացի շարունակականությունը՝ Հանձնաժողովը 2024 թվականին նախաձեռնել է տարածքային և տեղական մակարդակում ղեկավար պաշտոն զբաղեցնող անձանց շրջանում անհամատեղելիության պահանջների պահպանման մշտադիտարկում: Հաշվի առնելով, որ նախորդող տարիներին իրականացված մշտադիտարկման գործընթացը չի ներառել տարածքային և տեղական ինքնակառավարման մարմինները, ինչպես նաև քաղաքացիներից, ոլորտային հասարակական կազմակերպություններից և պետական տարբեր գերատեսչություններից Հանձնաժողովը հասցեագրված դիմում-գրությունների, վերաբերելի մեդիա հրապարակումների սուբյեկտների շրջանակը՝ Հանձնաժողովի կողմից 2024 թվականին անհամատեղելիության պահանջների պահպանման մշտադիտարկում իրականացնելու նպատակով որպես թիրախային պաշտոններ սահմանվել են տարածքային և տեղական մակարդակում ղեկավար պաշտոն զբաղեցնող անձինք՝ ՀՀ բոլոր մարզպետների և նրանց տեղակալների, ինչպես նաև ՀՀ բոլոր խոշորացված համայնքների ղեկավարների պաշտոնները (ընդհանուր՝ 102 անձ):

- ԳՐԵԿՈՒ-ի 96-րդ լիազումար նիստի շրջանակներում 2024 թվականի մարտի 22-ին հաստատվել է Հայաստանի վերաբերյալ գնահատման 5-րդ փուլի՝ «Կոռուպցիայի կանխարգելումը և բարեվարքության խթանումը իշխանության կառավարման մարմիններում (բարձրագույն գործադիր մարմիններում) և իրավապահ մարմիններում» [գեկույցը](#) (այսուհետ նաև՝ Ձեկույց): Այս շրջափուլում գնահատում է բարձրաստիճան պաշտոնատար անձանց (ԲՊԱ) և իրավապահ մարմիններում պաշտոն զբաղեցնող անձանց (ԻՄՊ) շրջանում կոռուպցիայի կանխարգելման համար Հայաստանում գործող շրջանակի արդյունավետությունը: Սույն գեկույցի ընդունումից հետո՝ 18 ամսվա ընթացքում, Հայաստանը գնահատող կողմին է զեկուցում ԳՐԵԿՈՒ-ի առաջարկություններին ի պատասխան ձեռնարկված գործողությունների մասին:

ՄՇՏԱԴԻՏԱՐԿՄԱՆ ՇՐՋԱՆԱԿ. ՊԱՇՏՈՆՅԱԼԵՐԻ ԽՈՒՄԲ

ԳՐԵԿՈՒ-ի գնահատող խմբի կողմից Հայաստանի գնահատման 5-րդ փուլի զեկույցի նպատակն էր գնահատել իշխանության կառավարման մարմիններում (բարձրագույն գործադիր մարմիններում) և իրավապահ մարմիններում կոռուպցիայի կանխարգելման և բարեվարքության խթանման ուղղությամբ Հայաստանի իշխանությունների կողմից ընդունված միջոցառումների արդյունավետությունը: 5-րդ փուլի գնահատման արդյունքներով ներկայացվել են առաջարկներ իշխանության գործադիր մարմիններում և իրավապահ մարմիններում կոռուպցիայի կանխարգելմանն ուղղված միջոցներ ձեռնարկելու վերաբերյալ:

Հաշվի առնելով, որ գնահատման շրջանակներում ուսումնասիրության առարկա է հանդիսացել գործադիր իշխանության մարմիններում կոռուպցիայի կանխարգելումը, Հանձնաժողովի կողմից 2025 թվականին անհամատեղելիության պահանջների մշտադիտարկում իրականացնելու նպատակով որպես թիրախային պաշտոններ սահմանվել են ՀՀ վարչապետի, փոխվարչապետերի, նախարարների և նրանց տեղակալների, ինչպես նաև ՀՀ վարչապետի, փոխվարչապետերի, նախարարների խորհրդականների պաշտոնները:

Հարկ է նկատել, որ պաշտոնների և վերջիններիս գործառույթների ռիսկայնությունը գնահատելիս ԳՐԵԿՈՒ-ի կողմից, ի թիվս այլնի, հիմք են ընդունվել վերջիններիս՝ կառավարման համակարգում ունեցած կարգավիճակը, նշանակման գործընթացը, որոշումների կայացման առանձնահատկությունները, վարձատրության կարգը:

Միաժամանակ, հիմք ընդունելով Ջեկույցով վերհանված ռիսկերը՝ սույն պլանով մշտադիտարկման ենթակա սուբյեկտների շրջանակը մոտարկվել է ԳՐԵԿՈՒ-ի կողմից Հայաստանի գնահատման 5-րդ փուլով նշված անձանց շրջանակին:

ՌԻՍԿԱՅԻՆ ՑՈՒՑԻՉՆԵՐ

Մշտադիտարկման գործընթացում որպես ռիսկային ցուցիչ դիտարկվում են համապատասխան պաշտոն զբաղեցնող անձանց վերաբերյալ հետևյալ տեղեկությունները՝

1. արժեթղթերի առկայությունը,
2. մեկից ավելի աղբյուրից ստացված աշխատանքի վարձատրությունը,
3. մասնակցությունն առևտրային կազմակերպությունների կանոնադրական կապիտալում,

4. ներկայացվածությունն առևտրային կազմակերպությունների կառավարման, վարչական կամ վերահսկողական մարմիններում,
5. պաշտոնատար անձի բաժնեմասի հավատարմագրային կառավարման վերաբերյալ տեղեկատվության բացակայությունը,
6. անհատ ձեռնարկատեր հանդիսանալու վերաբերյալ տեղեկատվությունը,
7. կարգավիճակով չպայմանավորված այլ պաշտոնի զբաղեցումը:
8. Պաշտոնատար անձանց կամ վերջիններիս հետ փոխկապակցված անձանց մասնակցությամբ կամ ներկայացվածությամբ առևտրային կազմակերպությունների դեպքում դրանց՝ պետական գնումների գործընթացներին մասնակցությունը:

ԱՆՀԱՄԱՏԵՂԵԼԻՈՒԹՅԱՆ ՊԱՀԱՆՁՆԵՐԻ ՊԱՀՊԱՆՄԱՆ ՄՇՏԱԴԻՏԱՐԿՈՒՄ ԻՐԱԿԱՆԱՑՆԵԼՈՒ ՄԵԹՈԴԸ (ՀԱՄԱՌՈՏ)

Մշտադիտարկումը նախատեսվում է իրականացնել չորս փուլով.

1. տվյալների հավաքագրում,
2. տվյալների ուսումնասիրություն,
3. տվյալների գնահատում/ամփոփում,
4. հրապարակայնության ապահովում:

1. Տվյալների հավաքագրում

1.1 Տվյալների հավաքագրումն իրականացվում է Հանձնաժողովի հանրային ծառայողների վարքագծի վերահսկողության վարչության աշխատակիցների կողմից՝ Հանձնաժողովին հասանելի տեղեկատվական շտեմարաններում, բաց աղբյուրներում, մեդիա հրապարակումներում, ինչպես նաև հայտարարագրերի համակարգում առկա վերաբերելի տեղեկությունների հավաքագրման միջոցով՝ ընդհանուր excel ձևաթղթում:

Նշված համադրեքստում ուսումնասիրության ենթակա են նաև պաշտոնատար անձանց շահերի հայտարարագրերը (դրանցում ներկայացված տվյալները), որոնք համադրվում են իրավաբանական անձանց պետական ռեզիստորում գրանցված տվյալների հետ:

1.2 Յուրաքանչյուր պաշտոնատար անձի համար վարչության նշված աշխատանքի պատասխանատու աշխատակցի կողմից ստեղծվում է անվանական թղթապանակ, որտեղ պահպանվում են անձի վերաբերյալ հավաքագրված, այդ թվում՝ վերաբերելի փաստաթղթերի կրկնօրինակները:

1.3 Տվյալների հավաքագրման փուլում թղթապանակներին հասանելիություն են ունենում միայն վարչության աշխատակիցները (այն աշխատակիցները, որոնք ներգրավված կլինեն կոնկրետ առաջադրանքում), ստորաբաժանման ղեկավարը, Հանձնաժողովի անդամները:

1.4 Տվյալների հավաքագրման փուլում պաշտոնատար անձանցից, այլ գերատեսչություններից տեղեկություն և/կամ պարզաբանում հայցելու հարցը ենթակա է քննարկման համակարգող անդամի հետ, ըստ անհրաժեշտության՝ նաև Հանձնաժողովի նիստում:

1.5 Պաշտոնատար անձի վերաբերյալ տվյալների հավաքագրումը համարվում է ավարտված, եթե առերևույթ խախտումը կամ խախտման բացակայությունն ապացուցելու համար անհրաժեշտ բոլոր նյութերն ապահովված են:

2. Տվյալների ուսումնասիրություն

2.1 Հավաքագրված տվյալների ուսումնասիրությունն իրականացվում է տվյալների համակողմանի վերլուծության, դրանց համադրման միջոցով:

2.2 Տվյալների ուսումնասիրությունը սկսվում է Հանձնաժողովին հասանելի պաշտոնական տեղեկատվական աղբյուրներից ստացված տեղեկությունների ուսումնասիրությունից՝ արդյունքները համադրելով մեդիա հրապարակումների և այլ բաց աղբյուրների տեղեկությունների հետ:

2.3 Ըստ անհրաժեշտության՝ ուսումնասիրվում են նաև պաշտոնատար անձանց հետ փոխկապակցված անձանց վերաբերյալ տեղեկությունները:

2.4 Ուսումնասիրություններն իրականացվում են միևնույն տեխնիկական և եզրույթային ձևակերպումների միջոցով՝ աշխատանքի միասնականությունն ապահովելու նպատակով:

3. Տվյալների գնահատում/ամփոփում

3.1 Ուսումնասիրությունների փուլն ավարտելուց հետո հավաքագրված տեղեկությունները և ուսումնասիրության տեղեկանքը ներկայացվում է վարչության պետին՝ ըստ անհրաժեշտության՝ հետագա քննարկումներն ապահովելու նպատակով:

3.3 Տվյալների հավաքագրման, ուսումնասիրության, ինչպես նաև գնահատման/ամփոփման փուլում վարչության աշխատակիցների հետ վարչության պետը պարտավոր է ապահովել անհրաժեշտ քննարկումները և փոխօգնությունը:

3.3 Ուսումնասիրության արդյունքում համապատասխան վարույթի հիմքեր արձանագրելու դեպքում ուսումնասիրության արդյունքները ներկայացվում են քննարկման Հանձնաժողովի նիստում՝ հետագա գործողությունների որոշման նպատակով, իսկ հիմքերի բացակայության դեպքում՝ այդ մասին զեկույցվում է Հանձնաժողովին:

3.4 Մշտադիտարկման աշխատանքները 2025 թվականի կտրվածքով համարվում են ավարտված՝ Հանձնաժողովի կողմից կատարված աշխատանքները դրական գնահատելուց հետո:

4. Հրապարակայնության ապահովում

4.1 Մշտադիտարկման աշխատանքների հրապարակայնությունն ու թափանցիկությունն ապահովելու նպատակով՝ արդյունքները պարբերաբար ենթակա են հրապարակման Հանձնաժողովի պաշտոնական կայքէջում:

ԻՐԱԿԱՆԱՑՄԱՆ ԺԱՄԱՆԱԿԱՀԱՏՎԱԾ

ԳՐԵԿՈ-ի գնահատող խմբի կողմից Հայաստանի գնահատման 5-րդ փուլի զեկույցով Հայաստանին կոչ է արվել մինչև 2025 թվականի սեպտեմբերի 30-ը ներկայացնել հաշվետվություն՝ ԳՐԵԿՈ-ի առաջարկություններին ի պատասխան ձեռնարկված գործողությունների մասին: Ըստ այդմ, հիմք ընդունելով սահմանված ժամկետը՝ անհամատեղելիության պահանջների մշտադիտարկման գործընթացը նախատեսվում է մեկնարկել 2025 թվականի մարտի 21-ից:

Մշտադիտարկման գործընթացի ամփոփումը նախատեսվում է իրականացնել մինչև 2025 թվականի օգոստոսի 31-ը:

Նախատեսում է 2025 թվականի մարտի 21-ից մինչև 2025 թվականի օգոստոսի 31-ն իրականացնել ՀՀ վարչապետի, փոխվարչապետերի, նախարարների և վերջիններիս տեղակալների, ինչպես նաև ՀՀ վարչապետի, փոխվարչապետերի, նախարարների խորհրդականների կողմից անհամատեղելիության պահանջների պահպանման ուսումնասիրություն:

Այսպիսով՝ 2025 թվականի ընթացքում նախատեսվում է իրականացնել ընդհանուր թվով 113 պաշտոնատար անձի անհամատեղելիության պահանջների պահպանման ուսումնասիրություն:

Սահմանված ժամանակահատվածում մշտադիտարկման սուբյեկտ հանդիսացող անձանց փոփոխության դեպքում՝ տվյալ պաշտոնին նշանակված կամ ընտրված անձանց նկատմամբ անհամատեղելիության պահանջների պահպանման մշտադիտարկումը կսկսվի վերջիններիս կողմից պաշտոնի ստանձնումից հետո մեկ ամիս անց: